

Os fondos mariños de Bueu: Unha mirada profunda



Gonzalo Pérez Barreiro



Fanecas en pecio



Nudibranquio (*Polycera quadriliniata*)

Bueu é un municipio con gran tradición mariñeira. A maioría dos seus habitantes continúan ligados dunha ou doutra maneira co mar, ese mar que tanto lles deu e que tamén, por desgraza, tanto lles quitou.

Moitos traballan a diario como pescadores ou mariscadores, outros tantos gozan do seu lecer navegando polo seu litoral, e cando chega o verán, as praias da súa costa abarrótanse de visitantes dispostos a tomar o sol e bañarse nas súas augas. Pero só uns poucos, moi poucos, se sumerxen nesas augas para descubriren os secretos que se ocultan baixo a súa superficie.

Desde hai máis de 15 anos, o Club de Mergullo Ons organiza cursos e saídas de mergullo desde o porto de Bueu, para poder adentrarse nese mundo submarino tan próximo e á vez tan descoñecido que non deixa de sorprendernos por máis veces que o visitemos: augas azuis e ás veces



Raia (*Raja undulata*)



Polbo (*Octopus vulgaris*)



Peixe pipa (*Entelurus aequoreus*)

verdes, claras e ás veces escuras, frías e ás veces máis frías, fondos con formacións rochosas caprichosas que son fogar de innumerables especies, a cada cal máis espectacular que a anterior: desde os coñecidos polbos e centolas aos descoñecidos nudibranquios (pequenos animais similares a babosas terrestres pero de cores vibrantes), e dos grises congros aos belos espirógrafos e pólipos *corynactis*.

Cando comecei a mergullar, hai máis de 40 anos, descubrín a maxia que se produce ao abandonar a superficie e descender co equipo de respiración autónoma: o mundo “habitual” coas súas preocupacións cotiás desaparece, o tempo cambia de ritmo, e un novo universo de sensacións, sons e visións rodéanos durante o escaso tempo que a nosa reserva de aire nos permite permanecer nel.



Un pequeno camarón

No meu caso, sempre tiven un sentimento encontrado: por unha banda práceme enormemente poder contemplar a beleza que me rodea cada vez que me mergullo, pero por outra banda entristéceme comprobar que omeu entorno familiar, amizades e xente en xeral non poidan deleitarse e gozar desa inigualable e esplendorosa visión, desa sensación que xera o estar suspendido entre augas respirando o aire acumulado no noso equipo de mergullo e contemplar as marabillas que forman ese mal chamado “mundo do silencio”.

Por ese motivo comecei a practicar a fotografía submarina, para poder capturar imaxes instantáneas do que vía e mostrarllas a aqueles que non tiñan esa posibilidade. E agora quero compartir con vostedes algunhas fotos tomadas nos fondos de Bueu agardando que lles sirvan para descubrir a algúns dos seus descoñecidos “veciños” e, quen sabe, quizáis algúns se animen a unirse á pequena familia de afortunados visitantes dos fondos de Bueu.

**Non se permite a reprodución das fotos sen permiso do autor.*